

خطِ اوّلِ پترُس

پیشگفتار

خطِ اوّلِ پترُس بلده ایماندارای نوشته شده که د شمالِ آسیای صغیر، یعنی د ترکیه امروزی زندگی موكد. مقصدِ پترُس از نوشته کدون امزی خط تشویقِ ایماندارای آسته که بخاطرِ ایمان خو آزار-و-اذیت موشد. پترُس یادآور موشه که عیسی مسیح قد مرگ و دوباره زنده شدون خو و وعده دوباره آمدون خو دزوا امید دده. او قد بیان امزی حقیقت ایماندارا ره تشویق مونه که آزار-و-اذیت ره قبول کده رنج و درد ره تحمّل کنه و اطمینان داشته بشه که ای آزمایش بلده خالص کدون ایمان ازوا آسته و د روزی که عیسی مسیح دوباره مییه دزوا اجر دده موشه.

پترُس علاوه ازی که ایماندارا ره تشویق مونه که آزار-و-اذیت و سختی ها ره تحمّل کنه، امچنان اونا ره نصیحت مونه که رقم کسای زندگی کنه که د مسیح تعلق دره.

فهرستِ عنوانها

دُعا و سلام (فصل ۱ آیه ۱)

أُمِيدِ زِنْدَه (٣:١)

پاک و مُقَدَّس بَشِيد (١٣:١)

سنگای زنده و قومِ اِنْتِخَابِ شُدَه (٢:٢)

إِطَاعَتِ از حُكْمَرَانَا و بَادَارَا (١٣:٢)

رَابِطَه خَاتُونُو و شُوبُو (١:٣)

رَنَجِ كَشِيدُو بَلَدَه كَارِ نِيك (٨:٣)

زِنْدَگِي دَ مُطَابِقِ دَ خَاسْتِ-و-إِرَادَه خُذَا (١:٤)

رَنَجِ و زَحْمَتِ كَشِيدُو دَ رَاهِ مَسِيحِ (١٢:٤)

نَصِيحَتِ بَلَدَه رِيَشِ سَفِيدَا و جَوَانَا (١:٥)

سَلَامِ هَايِ آخِرِي (١٢:٥)

۱ از طرف پتروس، رسول عیسی مسیح، بلده مسافرای که د منطقه های پُنطس، غلاتیه، کپدوکیه، آسیا و بطنیه تیت پَرَک شده، ۲ بلده کسای که د وسیله شناخت اَزلی آته مو خُدا انتخاب شد و روح شی اونا ره تقدیس کد تا اطاعت کنه و خون عیسی مسیح د بله ازوا پاش دده شنه: فیض و سلامتی پریمو نصیب شو شنه.

اُمید زنده

۳ حمد-و ثنا د خُدا و آته مولای مو عیسی مسیح که د وسیله رحمت بزرگ خو از طریق دُوباره زنده کدون عیسی مسیح از مُرده ها، مو ره از نو تولد کد، بلده یگ اُمید زنده ۴ و بلده میراثی که نه از بین مور و نه خراب موشه و نه پژمرده، بلکه د عالم باله بلده شو نگاه شده. ۵ و شو د وسیله قدرت خُدا از طریق ایمان خو بلده نجاتی حفظ شدید که آماده شده تا د آخر زمان ظاهر شنه. ۶ د امزی باره غدر خوش بشید، حتی اگه آلی بلده یگ زمان کم لازم شده که شو د وسیله آزمایشی رقم رقم غمگی-و-پریشان شنید ۷ تا اصل بودون ایمان شو که از طلای از بین رفتنی کده -- که د وسیله آتش آزمایش شده -- با ارزشتر آسته، د وخت ظهور عیسی مسیح باعث تعریف و افتخار و احترام شو شنه. ۸ با وجود که شو مسیح ره ندیدید، او ره دوست درید و اگرچه فعلاً او ره نمینگرید، ولی دزو ایمان درید و قد خوشی که بیان نموشه و پرجلال آسته خوشحالی مونید، ۹ چرا که شو حاصل ایمان خو، یعنی نجات جانهای خو ره د دست میرید. ۱۰ د باره امزی نجات، پیغمبر مطالعه و تحقیق عوج کده، امو پیغمبر که د باره فیضی که بلده شو مقرر بود، پیشگویی کده. ۱۱ اونا تحقیق موكد که سون کدم زمان یا کدم شرایط روح مسیح که د وجود ازوا بود اشاره مونه، وختیکه پیش از پیش د باره رنج های مسیح و د باره بزرگی-و-جلال بعد از رنج ها پیشگویی کد. ۱۲ اوخته دزوا برملا شد که اونا نه بلده خودون خو، بلکه بخاطر از شو خدمت موكد د باره امی چیزی که آلی دز شو اعلان شد. امی چیز از طریق کسای که خوشخبری ره دز شو آورد د وسیله روح القدس که از عالم باله ری شده دز شو اعلان شد. حتی ملایکه ها ام آرزو دره که د امزی چیز نظر کنه.

پاک و مقدس بشید

۱۳ پس فکر خو ره د کار بندزید و هوشیار بشید؛ تمام اُمید خو ره د فیضی بسته کنید که عیسی مسیح د وخت ظهور خو بلده شو میره. ۱۴ رقم بچکیچای باطاعت بشید و زندگی خو ره قد خواهشات نفسانی دوره جهالت خو شکل ندید، ۱۵ بلکه رقم امزو مقدس که شو ره کوی کده، شو ام د تمام رفتار خو پاک-و-مقدس بشید. ۱۶ چون

نوشته شده: "مُقَدَّس بَشِيد، چراکه ما مُقَدَّس اَسْتُمْ."

^{۱۷} ازی که شُمو اُمُو ره آته آسمانی مُوگید که تمامِ مردُم ره بَدُونِ طرفداری مُطابقِ اعمالِ ازوا قضاوتِ مونه، پس دَورونِ مُسافِرَتِ حُو ره دَزی دُنیا قد خُدا ترسی تیر کُنید، ^{۱۸} چُون شُمو مِیَدَنید که از راه-و-رفتارِ بے فایده که از بابِه کَلونای شُمو مَنده بُود بازخِردِ شُدید، نَه قد چیزای از بَینِ رفتنی مِثَلِ طِلا و نُقره، ^{۱۹} بَلکِه قد حُونِ با آرزشِ مسیح، که مِثَلِ حُونِ بارِه بے نُقص و بے عیب بُود. ^{۲۰} اُو پیش از خَلقَتِ دُنیا بَلدِه امزی مقصدِ اِنْتِخابِ شُد، لیکِن دَ زمانِ آخِرِ بَلدِه شُمو ظاهرِ شُد ^{۲۱} که دَ وَسِیلِه اَزُو شُمو دَ خُدا ایمان اُورید، دَ خُدا که اُو ره از مُردها دُوباره زنده کد و دَزُو بَزُرگی-و-جلالِ دَد تا ایمان و اُمیدِ شُمو دَ خُدا بَشَه. ^{۲۲} آلی که شُمو جانهای حُو ره دَ وَسِیلِه اِطاعتِ کدو از حَقِیقتِ پاک کدید تا بَلدِه پَرارو مَحَبَّتِ برادرانه و خالِصِ دَشْتِه بَشِيد، پس یگدیگه حُو ره از تَی دِلِ سخت دوست بَدَنید، ^{۲۳} چراکه شُمو از نُو تَوَلَّدِ شُدید، نَه از تَخَمِ از بَینِ رفتنی، بَلکِه از چیزای که از بَینِ نَموره، یعنی از کلامِ خُدا که زنده و اَبَدی اَسْتَه. ^{۲۴} چُون نَوشْتِه شُدِه:

"تمامِ اِنسان ها رِقَمِ عَلَفِ اَسْتَه"

و تمامِ شان-و-شَوکَتِ ازوا مِثَلِ کُلِّ عَلَفِ.

عَلَفِ پَزْمُرْدِه مَوشِه و کُلِّ شِی مِیرِزِه،

^{۲۵} لیکِن کلامِ خُدا تا اَبَدِ باقی مَومَنَه."

و ای اُمُو کلامِ اَسْتَه که دَ عِنوانِ خوشخبری بَلدِه شُمو اِعلانِ شُد.

^۲ پس تمامِ کَینَه، تمامِ حَیلَه-و-مَکر، ریاکاری، حسادت و تمامِ بَدگویی ره از خودون حُو دُور کُنید. ^۲ مِثَلِ نَلِغِه نَوزَیدِه شُدِه دَ شَوقِ-و-طَلَبِ شِیرِ خالِصِ روحانی بَشِيد تا دَ وَسِیلِه اَزُو بَلدِه نِجاتِ حُو رُشد کُنید، ^۳ اگه شُمو واقِعاً چَشیدید که مَولا مَهرَبو اَسْتَه.

سنگای زنده و قومِ اِنْتِخابِ شُدِه

^۴ شُمو که پیشِ مسیح مِیید یعنی پیشِ سنگِ زنده که مردُم اُو ره رَد کد، ولِی دَ نَظَرِ خُدا اِنْتِخابِ شُدِه و با آرزشِ

آسته،^۵ شمو ام رقم سنگای زنده حساب شده یگ خانه روحانی آباد موشید تا پیشوایون مقدس بشید و قربانی های روحانی ره که قابل قبول خدا آسته د وسیله عیسی مسیح تقدیم کئید. چون د نوشته های مقدس مویگه:

”اینه، ما د صهیون یگ سنگ میلم،

یگ پای سنگ انتخاب شده و باارزش؛

و هر کسی که دزو ایمان بیره شرمنده نموشه.“

پس بلده از شمو کسای که ایمان درید، او باارزش آسته؛ لیکن بلده بی ایمانا

”سنگی ره که اُستاکارا رد کد،

سنگ مهم تادو شده“

و^۸

”یگ سنگ که باعث لخشیدون مردم شده

و یگ قاده که اونا ره پورته مونه.“

اونا بخاطری میلخسه که از کلام اطاعت نمونه و اونا بلده امزی تعیین شده.^۹ لیکن شمو یگ نسل انتخاب شده آستید، مربوط پیشوایی شاهانه، قوم مقدس و متعلق د خدا، تا کارای بزرگ ازو ره که شمو ره از ترکی د نور عجیب خو کوی کده، اعلان کئید.^{۱۰} یگ زمان شمو کدم قومی نبودید، مگم آلی قوم خدا آستید؛ یگ زمان شمو از رحمت خدا محروم بودید، لیکن آلی رحمت ازو نصیب شمو شده.

^{۱۱} ای عزیزای که دزی دنیا رقم مسافر و بیگنه آستید، از شمو خاهش مونم که از خاهشات نفسانی که قد روح-و- روان شمو د جنگ آسته، دوری کئید.^{۱۲} رفتار خو ره د مینکل ملت ها نیک کئید که اگرچه اونا فعلاً شمو ره د عنوان بدکارا بدنام مونه، ولی از دیدون کارای نیک شمو، خدا ره د روز قضاوت شی حمد-و-ثنا بویگه.

إِطَاعَتِ از حُكْمَرَانَا و بادارا

^{۱۳} پس بخاطرِ مولا از هر قُدرت-و-اِختیارِ انسانیِ إِطَاعَتِ كُنید، چی از پادشاه که از یگ کده باله آسته، ^{۱۴} چی از والی‌ها که از طرفِ پادشاهِ رَبی شُده تا کسای ره که کارِ بدِ مُونه جَزَا بِدیه و کسای ره که کارِ نیکِ مُوکنه تعریف-و-تَوْصیفِ کُنه. ^{۱۵} چُونِ خاست-و-اِرَادِهِ خُدا امی آسته که شُمو قد انجامِ کارِ نیک، توره های جاهلانهِ مَرْدَمایِ لَوْدِه ره چُپِ كُنید. ^{۱۶} رَقْمِ مَرْدَمایِ آزادِ زَنْدگیِ كُنید، ولے آزادیِ خُو ره یگ پوششِ بَلْدِه شَرَاَرَتِ جورِ نَكُنید، بَلَكِه رَقْمِ خِدْمَتِگَارایِ خُدا رِفْتارِ كُنید. ^{۱۷} تمامِ مَرْدَمِ ره اِحْتِرَامِ كُنید؛ بَرارونِ اِیماندارِ ره دوستِ دَشْتِه بَشید؛ از خُدا بَتَرَسید؛ دِ پادشاهِ اِحْتِرَامِ كُنید.

^{۱۸} آیِ غُلاما، قد اِحْتِرَامِ كَامِلِ تابعِ بادارایِ خُو بَشید، نَه تنها تابعِ بادارایِ نیک و مَهرَبو، بَلَكِه امچنانِ تابعِ بادارایِ سَخْتِگیر-و-تُنْدخُو. ^{۱۹} اگه یگ نفرِ بخاطرِ وَجْدانِ خُدا تَرَسِ خُو ناحقِ رَنْجِ كَشیدِه دَرْدِه ره تَحْمُلِ كُنه، ایِ قَابِلِ تعریف-و-تَوْصیفِ آسته. ^{۲۰} اگه بخاطرِ کارِ بدِ لَت-و-كوبِ شُنید و تَحْمُلِ كُنید، چی اِفْتِخارِ دَرِه؟ لیکِن اگه بخاطرِ کارِ نیکِ خُو رَنْجِ بِنِگَرید و تَحْمُلِ كُنید، ایِ کارِ شُمو دِ پِیشِ خُدا قَابِلِ تعریف-و-تَوْصیفِ آسته. ^{۲۱} چُونِ شُمو بَلْدِه امزیِ كُویِ شُدید، چَراکه مَسیحِ امِ بخاطرِ اَزْشُمو رَنْج-و-عذابِ كَشید و بَلْدِه شُمو یگ سَرْمَشَقِ اِشْتِ تا شُمو دِ نَقْشِ قَدَمِهایِ اَزُو رِفْتارِ كُنید.

^{۲۲} ”اُو هیچِ گُناهِ نَكْد،

و هیچِ حیلِه-و-مَکَرِ دِ دانِ اَزُو پِیدا نَشُد.“

^{۲۳} و خْتیکِه اُو ره دَو-و-دَشْنامِ دَد، اُو پسِ دَو-و-دَشْنامِ نَدَد؛ و خْتیکِه اُو رَنْج-و-عذابِ كَشید، تَهْدیدِ نَكْد، بَلَكِه خودِ ره دَمَزُو تَسْلیمِ كَد که عَادِلانِه قِضاوَتِ مُونه. ^{۲۴} مَسیحِ خودِ شیِ گُناهایِ مو ره دِ جِسمِ خُو دِ بَلِه صَلیبِ بُردِ تا مو بَلْدِه گُناهها بُمُریِ و بَلْدِه عَدالت-و-نیکيِ زَنْدگیِ کنی؛ دِ وِسیلِه زخمِهایِ اَزُو شُمو شَفا پِیدا کَدید. ^{۲۵} چُونِ شُمو رَقْمِ گوسپندویِ بُودید که سُونِ گُمراهیِ مورفت، لیکِن آلیِ شُمو دُورِ خورده دِ پِیشِ چوپو و نِگاهوانِ جانِهایِ خُو اَمَدید.

رابطه خاتونو و شویو

^۳ امی رَقْمِ آیِ خاتونو، تابعِ شویونِ خُو بَشید تا اگه یگونِ ازوا از کلامِ إِطَاعَتِ نَكُنه، دِ وِسیلِه رِفْتارِ اَزْشُمو

خاتونو بدون که توره بگید د مسیح جذب شنه،^۲ یعنی د وسیله دیدون خداترسی و زندگی پاک شمو.^۳ نوربندی شمو د آرایش ظاهری نبشه که چوئی کدون موی و پوشیدون طلا و کالای خوب آسته،^۴ بلکه د انسان باطن یعنی د قلب شمو بشه که د وسیله نوربندی از بین نرفتنی روح آرام و ملایم آرایش شده که د نظر خدا باآرزش آسته.^۵ چون د زمان سابق ام خاتونوی مقدس که د خدا توکل دشت، د امزی رقم خودون ره آرایش موکد و تابع شویون خو بود.^۶ رقم ساره که از ابراهیم اطاعت موکد و او ره بدار گفته کوی موکد. شمو ام دختران ازو کوی موشید، د شرطی که کار نیک کئید و از هیچ چیزی که شمو ره وحشت زده مونه ترس نخورید.^۷ امی رقم ای شویو، شمو ام قد خاتونوی خو عاقلانه زندگی کده اونا ره بحیث ظرف ظریف احترام کئید، چون اونا ام قد شمو وارث تحفه پرفیض زندگی آسته، تا هیچ چیز مانع قبول دُعاهای شمو نشنه.

رنج کشیدو بلده کار نیک

^۸ خلاصه، پگ شمو یگدل و همدم بشید، مُحَبَّتِ برادرانه دشته بشید و دلسوز و فروتن بشید.^۹ د عوض بدی، بدی نکئید و د عوض دو-و-دشنام، دو-و-دشنام نئید، بلکه د عوض شی خیر-و-برکت طلب کئید، چون بلده امزی شمو کوی شدید تا وارث برکت شئید.^{۱۰} چون نوشته شده:

”هر کسی که زندگی ره دوست دَره

و میخایه روزای خوب ره بِنگره،

باید زبون خو ره از بدی نگاه کُنه

و لبای خو ره از گفتون توره پرفریب.

^{۱۱} از بدی پرهیز کده نیکی کُنه؛

د طلب صلح بَشه و پُشت شی بگرده.

^{۱۲} چراکه چیمای خداوند د بِلَه آدمای عادل آسته

و گوشای شی سون دُعاهای ازوا،

لیکن زوی خُداوند دَ ضِدِ آدمای بدکار آسته.

^{۱۳} اگه شُمو بلده کار نیک شوق دَرید، کی آسته که دز شُمو صَرَرِ پُرسنه؟ ^{۱۴} ولے حتی اگه بخاطر انجام دَدون کارای نیک از مردُم رنج مینگرید، نیک دَ بخت شُمو. از ترس ازوا وَحَشَت زده نَشْنید و پَریشان نَبَشید، ^{۱۵} بلکه مسیح ره بَحِیثِ مَولا دَ دلہای خُو مُقَدَّس بَدنید. همیشه آماده بَشید تا اگه کُدم کس دَلیلِ اُمیدی ره که دز شُمو آسته پُرسان مونه، بلده شی جواب بَدید، لیکن دَ نرَمی و اِحترام. ^{۱۶} وجدان خُو ره پاک نگاه کُنید تا کسای که شُمو ره بدنام مونه، از بد گُفتون خُو بخاطر رفتار نیک شُمو دَ خِدْمَتِ مسیح، شرمندہ شُنه. ^{۱۷} اگه خاست-و-ارادہ خُدا امی آسته که رنج بِنگری، بهتر آسته که بخاطر کار نیک رنج بِنگری، نه بخاطر کار بد. ^{۱۸} چراکه مسیح ام یگ دَفعه بخاطر گناه های انسان رنج کشید، یعنی شخصِ عادِل بلده گناهکارا رنج کشید، تا شُمو ره پیش خُدا بیرہ. اگرچه او دَ جسم کُشته شد، لیکن دَ روح زنده بود ^{۱۹} و دَ وسیله روح رفته بلده ارواحی که بندی بود موعظه کد، ^{۲۰} بلده ارواحی که دَ زمانِ سابقِ اِطاعت نکد، غَبْتیکه خُدا قد صبر-و-حوصله دَ روزای زندگی نوح، دَ دورون جور شُدون کشتی اِنْتظار میکشید. دَ امزو کشتی تعداد کم، یعنی هشت نفر دَ وسیله آو نجات پیدا کد. ^{۲۱} امی آو نَمونه غُسل تعمیم آسته که فعلاً شُمو ره نجات میدیه؛ ای غُسل نه بلده دُور کدون چرگ-و-چتلی از جسم، بلکه یگ درخاست بلده وجدان پاک از خُدا آسته و دَ وسیله دُوباره زنده شُدون عیسی مسیح دَ دست مییه ^{۲۲} که مسیح دَ عالم باله رفته و دَ دست راست خُدا یه و ملایکه ها، قُدرت ها و قُوت ها تابع ازو شُده.

زندگی دَ مُطابقِ خاست-و-ارادہ خُدا

^{۱۴} پس از خاطری که مسیح دَ جسم رنج کشید، شُمو ام دَ امزو نیت خودون خُو ره مُسَلح کُنید، چُون کسی که دَ جسم رنج کشیده، او گناه کدو ره ایله کده، ^۲ تا باقی عُمَر خُو ره دَ جسم، نه مُطابقِ خاھشاتِ انسانی، بلکه مُطابقِ خاست-و-ارادہ خُدا زندگی کُنه. ^۳ چُون دَ گُذشته شُمو کلو وخت خُو ره دَ کارای تیر کدید که مردمای خُدا ناشناس خوش دره انجام بَدیه: دَ فسق-و-فساد، خاھشاتِ نفسانی، شراب خوری، عیاشی، محفل های عیبش-و-نوش و بُت پرستی نفرت انگیز. ^۴ اونا خيرو منده که شُمو دیگه قد ازوا دَ بے بندوباری های از حد کلو یگجای نَموشید و امزی خاطر شُمو ره بد-و-رد مَوگیه. ^۵ لیکن اونا دَ خُداي حساب میدیه که آماده یه تا تمام زنده ها و مُرده ها ره قضاوت کُنه. ^۶ دَمزی دَلیل خوشخبری حتی بلده مُرده ها ام اعلان شُد تا اگرچه اونا مثل پگ انسان ها دَ جسم قضاوت شُده مُرد، ولے دَ مُطابقِ خاست-و-ارادہ خُدا دَ روح زندگی کُنه.

^۷ ختم تمام چیزا نزدیک آسته. پس فکر خو ره بگیریډ که د دعای خو منظم-و-مرتب بشیډ. ^۸ از پگ کده اول، یگدیگه خو ره سخت محبت کنیډ، چراکه محبت عذر گناهها ره مپوشنه. ^۹ از یگدیگه خو بدون نق نق کدو مهمون نوازی کنیډ. ^{۱۰} هر کدم شمو هر تحفه ره که یافتیډ، بلده خدمت د یگدیگه خو از شی کار بگیریډ، مثل ناظرای خوب که از فیض مختلف خدا درست استفاده مونه. ^{۱۱} اگه کدم کس د جم شمو توره موگیه، رقمی کسی گپ بزنه که پیغام خدا ره اعلان مونه؛ اگه کدم کس خدمت مونه، او مطابق توانایی که خدا دز شی دده، خدمت کنه تا د تمام چیزا خدا د وسیله عیسی مسیح بزرگی-و-جلال پیدا کنه. جلال و قدرت تا ابدالآباد ازو آسته. آمین.

رنج و زحمت کشیډو د راه مسیح

^{۱۲} ای عزیزا، ازی آتشی که بلده آزمایش شمو د مینکل شمو قرار گرفته، خیر و نشنید که بگی کدم چیزی عجیب-و-غریب د زندگی شمو رخ دده، ^{۱۳} بلکه د اندازه که شریک رنج-و-عذاب مسیح آستید، د امر و اندازه خوش بشیډ، تا د وخت ظهور بزرگی-و-جلال شی پتیډ کلو خوشحالی کنیډ. ^{۱۴} اگه بخاطر نام مسیح دو-و-دشنام میشتوبیډ، نیک د بخت شمو، چراکه روح پر جلال خدا د بله شمو قرار میگیره. ^{۱۵} مگم نیلید که کدم شمو د عنوان یگ آدم کش، یگ دز، یگ شرارت پیشه یا مداخله گر رنج-و-عذاب بکشه، ^{۱۶} لیکن اگه د عنوان یگ مسیحی رنج-و-عذاب میکشه، شرمینده نشنه، بلکه خدا ره حمد-و-ثنا بگیه که ای نام د بله شی آسته. ^{۱۷} چون وخت شی رسیده که قضاوت از خانوار خدا شروع شنه؛ و اگه شروع شی از سر ازمو موشه، پس عاقبت کسای که خوشخبری خدا ره قبول نمونه، چی موشه؟ ^{۱۸} و

«اگه بلده آدم عادل سخت آسته که نجات پیدا کنه،

قد آدم بے خدا و گناهکار چیز کار موشه؟»

^{۱۹} امزی خاطر کسای که مطابق خاست-و-اراده خدا رنج-و-عذاب میکشه، خود ره د خالق وفادار بسپاره و د انجام ددون کار نیک ادامه بدیه.

نصیحت بلده ریش سفیدا و جوانا

^۵ ما که خود مه یگ ریش سفید و شاهد رنج-و-عذاب مسیح آستم و شریک بزرگی-و-جلالی که ظاهر موشه، د

ریش سفیدای که د مینکل شمو آسته، نصیحت موم: ^۲ گله خدا ره که دز شمو سپرده شده چوپونی کنيد و فکر خو ره سون شی بگيريد، ليکن نه از روی مجبوری، بلکه د رضای خو، [امو رقم که خدا ميخايه] و نه ام بخاطر فايده شرم آور، بلکه بخاطر شوق-و-علاقه که دريد. ^۳ د بله کسای که دز شمو سپرده شده باداری نکنيد، بلکه بلده امزو گله يگ سرمشق بشيد. ^۴ و غيتيکه چوپون بزرگ ظاهر موشه، شمو تاج بزرگی-و-جلال ره د دست ميريد که هرگز خاصيت خو ره از دست نميديه.

^۵ امی رقم ای جوانا، تابع ریش سفيدا بشيد. آره، پگ شمو قد يگديگه خو د فروتنی رفتار کنيد، چراکه

«خدا قد آدمای مغرور مخالفت مونه،

ليکن د آدمای بے کبر فيض موبخشه.»

^۶ پس خودون خو ره د زير دست پرفدورت خدا فروتن کنيد تا د وخت معين شمو ره سر بلند کنه. ^۷ تمام تشويشهای خو ره دزو ايله بديد، چراکه او د فکر شمو آسته. ^۸ ادر و بيدار بشيد، چراکه دشمنون شمو ايليس رقم شير غران ايسو-و-اوسو ميگرده و موياله تا که يگو کس ره قورت کنه. ^۹ پس د ايمان خو محکم-و-استوار منده د برابر ازو مقاومت کنيد، چون شمو خبر دريد که برارون ايماندار شمو د تمام دنيا د امزی رقم رنج-و-عذاب گرفتار آسته. ^{۱۰} مگم خدای تمام فيضها که شمو ره د بزرگی-و-جلال ابدی خو د وسيله مسيح کوی کده، بعد از کم وری رنج-و-عذاب، خود شی شمو ره سرپای، استوار، قوی و برقرار مونه. ^{۱۱} قدرت-و-قوت تا ابدالآباد ازو باد. آمين.

سلام های آخري

^{۱۲} ما د کومک سيلوانس که او ره يگ برار وفادار حساب موم، امی خط کوتاه ره بلده شمو نوشته کدم تا شمو ره تشويق کنم و شاهدي بديم که فيض حقيقي خدا اينمی آسته که بيان کدم؛ دز شی محکم-و-استوار بنميد. ^{۱۳} جماعت ايماندارای شار بابل که قد شمو قتی انتخاب شده و باچه روحانی مه مرقس دز شمو سلام ربي مونه. ^{۱۴} يگديگه خو ره قد روی ماخی محبت آميز سلام بگيد. سلامتی-و-آرامش نصيب پگ شمو که د مسيح تعلق دريد. آمين.